



**Meeqqat 18-nit inorlugit ukiullit kinguaassiuutitigut atonerlunneqarsimasut, taakkunungalu angajoqqaajusut/akisussaasut, tarnip nakorsaanik piaartumik ikiorserneqarnissamik periarfissaqalernissaannik pisinnaatitaaffealernissaat pillugu nassuiaasioqqullugit Naalackersuisut peqquneqarnissaannik Inatsisartunut aalajangiiffigisassatut siunnersuut. Misissuineq periuserineqarsinnaasunik saqqummiussisussa qiviusunngornissaanullu pisariaqartinneqartunik takussutissiisussa, tamatumani aningaasatigut allaffissornikkullu kingunissai ilanngullugit, kingusinnerpaamik UKA2023-qarnerani Inatsisartunut tunniunneqassaaq.**

(Inatsisartunut ilaasorta q Anna Wangenheim, Demokraatit)

(Siullermeerneqarnera)

Demokraatit Inatsisartunut ilaasortaataannut Anna Wangenheim-imut siunnersuummut pitsaasumut qujanaq.

Piffissanngorpoq, inuiaqatigiittut pinerlineqarsimasunut illersuinerunissarput. Paatsuugassaangitsumik ukkatarinnineq aningaasallu nuuttariaqarpagut, pinerlineqarsimasunut iluaqutissanngorlugit pinerliisimasunut iluaqutissanngunnginnerini.

Una siunnersuut assersuutissatsialaavoq, sivisullaamik kukkusumik tulleriiarisimanitsinnut. Eqqarsaatigeriartigu, meeraq kinguaassiuutitigut atonerlunneqartoq erngerluni tarnip nakorsaanik ikiorneqarnissaminik neqeroorfigineqanngitsoq. Amerlasuunut inuunermik aseruinermik kinguneqarsinnaalluni. Tamanna akuerineqarsinnaangilluinnarpoq.

Taamaassimassoorlu angajoqqaanut, meeqqaminnik kinguaassiuutitigut atonerlunneqarsimasumut, aliasunnerujussuaq qanoriliuusissaarunnerlu. Naatsorsuutigiinnarsinnaavara, qanoq eqqarsaasertarsimassasut qanorlu tarnikkut artornarsimatiginera. Kialluunniit oqaluttuutissanngilaanga, taamaattoqartillugu tarnip nakorsaanik ikiorneqarnissamik pisariaqartitsisoqanngitsoq.

Aallaqqaasiullugu misissortigu, qanoq iliorutta meeqqat 18-nit inorlugit ukiullit, kinguaassiuutitigut atonerlunneqarsimasut, taakkunungalu angajoqqaajusut/oqartussaassusermik tigummaaqaartut, tarnip nakorsaanik ikiorneqarnissaasa inatsisatigut piumasaqaataasinnaanera. Piumasaritigulu, Naalackersuisut piaarnerpaamik misissuisitsineq taamaattoq pingaartillugu aallartissagaat, pinerlineqarsimasunut taakkununga pissutsit pitsanngorsarniarlugit sulineq aallartinniassammat.

Siunnersuut Ilaqutariinnermut- aamma Peqqisutsimut ataatsimiititaliamut Inatsiseqarnermut Ataatsimiititaliami tusarniaanertalerlugu suliareqqinneqarnissaa innersuussutigaarput.